

四庫全書

史部

欽定四庫全書

五代會要卷二十九

宋 王溥 撰

契丹

契丹本鮮卑之種也居遼澤之中潢水之南遼澤去榆關一千一百二十里榆關去幽州七百十四里其地東南接海東際遼河西北包冷陁北界松陁山川東西三千里地多松柳澤饒蒲葦其族本姓達呼哩後分為八部

一曰達爾扎部二曰伊斯輝部三曰舍輝部四曰諾爾威
部五曰頗摩部六曰訥古濟部七曰濟勤部八曰實衮
部營縣四十一每部有刺史每縣有令酋長號契丹王
唐制兼松漠府都督幽州置松漠府長史一人監之其
後諸姓不常唐會昌中幽州節度使張仲武表其王齊
蘇請賜印篆為奉國契丹之印朝廷從之其八族長皆
號曰大人稱刺史內推一人為王建旗鼓以尊之每三
年第其名以代之唐末有耶律安巴堅者怙強好勇不

受諸族之代吞侵隣部兵力漸盛嘗與後唐太祖會盟於雲州結為兄弟其後僭稱帝號以妻舒嚕氏為皇后燕人韓延徽為宰相法令嚴明諸部皆畏伏之

梁開平元年四月遣其首領袍笏美楞等來貢方物至二年二月其王安巴堅又遣使來貢良馬 五月又遣

使嘉哩貢納馬十匹金花鞍轡貂鼠皮裘并冠男口一年十歲名曰蘇女口一年十二歲名曰譬其妻舒嚕氏貢朝霞錦前國王欽德并其大臣皆有貢獻太祖命司

農卿渾持石千牛衛將軍郎公遠充使就本國宣諭

三年閏八月又遣首領格爾來貢方物太祖御文明殿
召格爾等五十人張謙賜金帛等有差至五年四月又
遣使實拉美楞來朝貢

後唐同光二年三月安巴堅率所部入寇新城其年七
月又率兵東攻渤海國至九月為隣部室韋女真迴鶻
所侵十二月又入寇嵐州 三年二月復入寇幽州為
王師所敗俘其首領奇嚕等其年五月又遣使伊喇孟

等來貢方物 四年正月安巴堅將復寇渤海國又遣
梅老轄哩以下三十七人貢馬三十匹詐修和好

天成元年七月攻渤海國扶餘城下之命其長子托雲
為國主號東丹王其月二十七日安巴堅得疾而死第
二子元帥太子德光嗣立德光本名耀庫濟慕中國之
名故改為德光初安巴堅有三子長號人皇王次號元
帥太子次曰安圖少君及安巴堅死其妻舒嚕氏令第
二元帥太子德光勾當兵馬令少子安圖少君往渤海

國代托雲將立為嗣而元帥太子素為部族所敬又其
母舒魯氏亦常鍾愛故因而立之偽稱天顯元年尋葬
安巴堅于西樓

番中地名

偽謚大聖皇帝其年十月遣使實

古訥來告哀明宗輟其月十九日朝叅以禮之其月偽
平州守時領幽州節度使盧又進率戶口兵馬車帳來
降至二年十一月又遣使美楞等二十餘人朝貢兼申
和好之意明宗命飛勝指揮使安念德齎錦綺綾羅及
金花銀器寶裝酒器等賜之又賜其母舒魯氏綉被一

張并寶裝瓔珞至三年正月復入攻陷平州而去至其
年五月定州節度使王都叛命潛相連構其王德光遣
首領托諾率部衆數千騎入定州至七月又遣首領特
哩衮率七千餘騎來援尋為行營招討使王晏球等逆戰
破之勦戮甚衆餘黨復為幽州節度使趙德鈞襲之殺
獲殆盡擒其首領特哩衮其月王晏球又獲契丹絹書
二封來進明宗命宣示羣臣莫有識其文字者契丹本
無文記唯刻木為信漢人陷番者以隸書之半就加增

減撰為番書同光之後稍稍有之其年八月幽州部送所獲番將特哩衮下兵百餘人至京師明宗皆赦之選其尤壯健者立為契丹直其首領皆賜姓吉時言事者以為邊人悻戾不可置於君側俄而有首領吉昭蘇自京遁歸奪船過河至深州捕獲斬之至其年閏八月偽平州刺史張希崇來降四年三月定州行營招討使王晏球擒托諾等二十餘人獻于闕下悉命戮之

長興元年十一月契丹渤海因東丹王托雲率番官四

十餘人馬百匹自登州泛海內附明宗御文明殿召對
及其部曲慰勞久之賜以衣冠金玉帶鞍馬綿線器物
等托雲進本國印三面命宣示宰臣其年十二月中書
門下奏契丹國東丹王托雲遠泛滄溟來歸皇化請賜
姓名仍准番官入朝例安排謹按四裔入朝番官有懷
德懷化歸德歸化等將軍中郎將名號又本朝賜新羅
渤海兩番國王官初自檢校司空至太保今托雲是安
巴堅之子請比新羅渤海王例施行勅渤海國王人皇

王托雲契丹先收渤海國改為東丹其托雲宜賜姓東丹名慕華授光祿大夫檢校太保安東都護兼御史大夫上柱國渤海郡開國公食邑一千五百戶充懷化軍

節度瑞慎等州觀察處置押番落等使

二年九月復姓李名贊華三年

五月授滑州節度為廢帝所殺

至二年其契丹主母舒嚕氏以其子托

雲歸國遣使朝貢明宗深慰納之至三年三月禮賓使梁進德自契丹報聘回稱其王請放策稜錫里還本國

策稜亦定州所獲番將也

又謂去年十二月其王帳前有大星晝隕

聲若雷震其月又遣使特哩袞羅卿進馬三十匹亦求策稜歸國故也五月特哩袞羅卿回明宗欲放策稜等令歸大臣爭之未決會幽州節度使趙德鈞上表論奏及易州刺史楊檀皆言不可遣其事乃止仍遣策古錫里隨其使歸不欲全阻其請也其年七月又遣使都督實魯進馬三十匹

清泰三年五月晉高祖起義於太原九月官軍集于城下晉乃間道發使召德光為援是月德光率部落五萬

餘騎至太原城下尋敗招討使張敬德楊光遠之兵降
晉安大砦

晉天福元年十一月高祖踐位以德光有援助之力軟
血為盟結為父子仍約歲輸絹十三萬足割雁門以北
及幽州所屬縣並隸番界德光又率兵迓高祖於潞州繫幽州節度
使趙德鈞并其子趙延壽而回三年二月德光遣使于嘉
哩錫里美楞來聘三年十月又遣使來上尊號曰英武
關
義晉高祖繼命宰臣馮道趙瑩劉昫等齎貨珍幣歲時

進貢不絕德光亦遣名王以下來至六年六月節度使
安重榮執契丹使伊喇等以輕騎掠幽州之南界高祖
累遣中使齎詔開諭以契丹有助立之功不欲負其宿
約而重榮奸險肆志竟誅伊喇等馳檄天下言契丹之
罪惡與襄州節度使安從進連謀不軌高祖命杜重威
率兵討之至貝州宗城縣相遇重榮之衆大敗至七年
正月二日收復鎮州斬重榮首漆之送於契丹至其年
四月高祖不豫少帝嗣立正月遣使隆鄂特來致弔兼獻

衣服鞍馬等至十月又遣使大卿以下二十六人來聘以高祖山陵有日致祭故也至九年正月德光遣趙延壽趙延昭等率兵五萬入寇貝州少帝發兵屯守澶州初青州節度使楊光遠構逆謀乃繕治城隍蓄聚芻粟為跋扈之計屬歲不稔餓莩相繼朝廷以廩帑虛竭軍用不給乃發使郡縣括借民家貲財斛斗海內嗷嗷不堪其命光遠遂以重利誘德光入寇又以趙延壽等皆中原人士常有思歸之意冀羣雄盜國晉祚不濟則大

福在己其月德光自河間率諸部兵入犯甘陵陷之巡檢使吳巒投井而死河北大擾少帝駐驛澶州命宋州節度使高行周等將兵以禦之三月德光自領部衆十餘萬來攻戚城官軍拒之而退又以趙延壽行魏博節度使改封魏王以延壽門人高融為節度副使統步奚及燕軍數萬營于南庸四月又陷德州博州其年十二月德光又率衆南下攻圍鎮州諸邑皆陷之

開運二年二月前鋒至邢州鎮州節度使杜重威差人

間道告急少帝欲親率大軍渡河決戰乃命鄆州節度使張從恩等將兵合諸將之師屯於邢州時德光之衆以及魏府建牙于元氏從恩等引軍而退其月又陷祁州刺史沈斌死之至三月德光退杜重威等率兵攻契丹之泰州下之回及易州為德光精騎所圍諸將等力攻死戰德光大敗至三年八月契丹所部瀛州刺史偽言納款少帝復命杜重威等率大軍迎降至十一月回及鎮州之東垣渡與番相遇十二月六日遣前鋒奪橋

為番軍所敗其月十日杜重威等以軍降于德光命相
州節度使張彥澤率漢騎闕二千先入京城至明年

正月一日德光自將大軍至京北百僚素服班於野次
匍伏請罪皆命釋之尋降授少帝檢校太尉負義侯令
挈其族及將相近臣等于契丹黃龍府安置二月德光
降偽赦改國號大遼稱會同十年升鎮州為中京以燕
王趙延壽為大丞相中京留守三月德光自京率衆北
歸至四月十八日死于欒城其年五月宣遺制以永康

王烏雲襲其偽位永康王者東丹王托雲之長子烏雲
自以猶子不當嗣立且不奉祖母之命其諸部首領素
畏舒魯氏之酷法復以安巴堅死於渤海國被殺者百
人今德光沒于漢地慮必獲罪如前同謀以其月二十
一日領部族歸國舒魯氏歸于石橋

蕃中地名

其衆悉降于

烏雲命送舒魯氏于安巴堅明殿以幽之

安巴堅陵寢謂之明殿

偽

改會同十年為天祿元年自稱天授皇帝

漢乾祐三年十一月烏雲率騎數萬南寇陷邢州之內

丘縣深州之就陽縣

周廣順元年正月太祖命左千牛衛將軍朱憲往修和好烏雲亦遣使尼古察報命獻良馬四匹太祖復命尚書左丞田敏供奉官蔣光遂銜命往聘至其年四月田敏等回烏雲遣使實魯獻碧玉金鍍銀裏鞍轡并馬四匹其月太祖又命左金吾將軍姚漢英右神武將軍華光裔往使至其年九月烏雲為部下太寧王子燕王舍音所殺舒魯王子德光之子勒所部兵誅太寧王舍音而

舒魯自立號天順皇帝改名燝稱應歷元年

顯德元年春太原劉崇將圖南寇舒魯氏番將楊衮率
驍騎萬餘以助之三月世宗親征與崇戰于潞州高平
縣之西原崇軍大敗番衆棄甲而逃二年三月命許州
節度使王彥超皆築壘于李晏口與番兵數千騎戰于
安平縣之南敗之

黨項羌

黨項羌古析枝之地漢西羌之別種其地東至涇州南接

春桑迷桑諸羌北通吐谷渾處山谷間亘三千餘里種
有數姓自為部落一姓之中復分為小部落有細封氏
費聽氏析利氏野辭氏房當氏米禽氏拓拔最為強族
俗皆土著居有棟宇織毛罽以覆之其人多壽或至百
五六十歲不事生業好為盜竊前世或來朝貢自唐寶
應正元之役皆率部族內附居慶州號平貢部落會昌

初命三使以統之

在寧延州界者命侍御史崔彥邠曾
主之在夏州者命侍御史李霽主之

在靈武麟勝州者命
侍御史鄭賀主之

後唐同光二年二月遣使朝貢十二月其首領簿備香
來貢良馬

天成二年九月河西羌項如連山等來朝共進馬四十
匹 四年四月勅沿邊置場買馬不許番部至闕下自
上御極以來黨項之衆競赴都下賣馬常賜食於禁廷
醉則連袂歌其土風凡將到馬無駕良並云上進國家
雖約其價直以給之然計其館給賜賚每年不下五六
十萬貫大臣以為耗蠹中原無甚于此因降勅止之雖

有是命竟不能行 其年九月首領折遇明等來貢方
物十月首領來有行來朝進馬四十匹上御中興殿閱
所進馬樞密使安重誨奏曰吐渾黨項近日相次進馬
皆給價直對見之時別賜繒帛計其所費不啻價倍請
止之上以為國家常苦馬不足每差綱收市今番言自來
何費之有外番朝貢中國錫賜朝廷常事不可以自止
番部羊馬不絕于路

長興元年正月其首領來朝貢授萬德懷化司戈 其

年十二月以黨項折家族五顛都知兵馬使折之正為
檢校尚書右僕射簿備家族都督簿備撒羅檢校工部
尚書 二年正月首領折七移等進駝馬其年十二月
又遣首領來進所奪得契丹旗號并馬等 三年正月
以西路黨項部族劫掠使臣及外域進奉命邠州節度
使樂彥稠靈武節度使康福等率步騎七千往方渠顛
已來討其叛命者其年二月行營邠州節度使樂彥稠
等奏誅黨項阿埋三族常悉哀勤彊賴埋廝骨尾屈悉

保等十七族七百餘人又率兵自牛兒族入白魚谷追及背叛黨項白馬慮家六旅客戶三族獲大首領連香入薩玉都統悉那埋摩侍御乞埋嵬悉逋等六人兼黨項二十餘人獲持馬牛羊數千計至晚師還野次其地無水軍士方渴俄有風雲自東而起是夜初更降雪一尺軍中以為神助上令造捷使之方山軍諭軍中所獲牛羊等物各令士卒自取勿得收斂以進奉為名

周廣順二年六月以府州黨項泥也六族防禦使歸化

將軍泥香王子又泥也六首領拓拔山並為歸德將軍
三年二月慶州刺史郭彥欽奏黨項野鷄族掠奪商
旅請出兵討之時彥欽贖貨嗜其利以州北野鷄族多
羊馬作法擾之番情獷悍屢不從順乃誣奏之太祖遣
中使齎詔撫部族既苦彥欽虐政不時報命遂詔邠州
節度使折從阮合寧州刺史張建武進兵討之建武勇
於立功徑趨野鷄族追擊殺數十百人有喜王族折思
族殺牛族彼無猜貳聞官軍討伐競來餉饋官軍利其

貨財皆劫掠之諸族乃相聚官軍至包山峻險之地逆戰敗之投崖谷死者甚衆折從阮保兵而退太祖怒彥欽勒歸私第左遷建武為率府率命前解州刺史鄭元昭為慶州刺史以招撫之

于闐

于闐在京師西九千九百餘里西南帶慈嶺與婆羅門相接去三千餘里南與吐番接西北至疎勒國二千餘里國城之東有白玉河西有綠玉河次西有烏玉河其源

同出于崑岡山去于闐西一千三百餘里每歲至七八月小水之後取玉于河謂之撈玉官取之後方許私取禁令甚嚴地多蒲萄醞而為酒味極醇美其俗好事祆神唐貞觀中其王伏闐信來朝復遣子入宿衛其後亦時來朝貢

晉天福三年九月其王李聖文遣使馬繼榮進白玉白羴犛牛尾紅鹽鬱金礪砂大鵬砂玉裝鞦轡等物其年十月冊聖文王大寶于闐因王命供奉官張匡鄴為國

信使仍授入朝使馬繼榮為鎮國大將軍扶風郡開國公
食邑二千戶副使黃門將軍張國載通試衛尉卿殿頭
承旨通事舍人吳順規試將作步監

漢乾祐元年五月復遣使朝貢六月以入朝使王知鐸
為檢校司空副使張文達判官秦元寶為檢校左右僕
射監使劉行立檢校兵部尚書

突厥

突厥之始前書載之備矣自號可汗猶古之單于妻號

可賀敦猶古之闕氏也子弟謂之特勅別部領兵者皆謂之設其大官屈律啜次阿婆次頡利法次吐屯次俟斤並代居其官而無員數父兄死則子弟襲其位北番之中最為強盛至唐室之末為諸番所侵部旅微弱亦嘗來朝貢

後唐天成二年正月其首領張慕晉朝貢

長興二年正月其首領杜阿熱來朝貢

晉天福六年七月其首領遣使薛同海以下一十七人

來朝貢

ク
ン
リ
ニ
ノ
ト
リ

正
大
和
年

十
七

五代會要卷二十九

欽定四庫全書

五代會要卷三十

宋 王溥 撰

吐番

吐番在長安西八千里本漢西羌之地其種落莫知所
出或云南涼禿髮利鹿孤之後其子孫以禿髮為國號
語訛託謂之吐番國人號其主為贊普置大論小論以
統理國事無文紀刻木為約其國王與臣下一年一小

盟三年一大盟其俗隨畜牧不常其居然亦有城郭都城號邏步城屋皆平頭貴人處于大毡帳謂之排廬不知節候以麥熟為歲首唐貞觀中嘗來朝貢自後吞併諸番兵力日盛屢為邊患河西隴右之地悉為所取至大中初其國亂朝廷復得六關之地至唐室末又為侵據唐分天下為十道河西隴右三十三州涼州最為大鎮土地沃壤人物繁庶開元天寶中置八監牧馬三十萬雜畜稱是其西復置安西都護府距長安八千里羈

縻西番三十國軍鎮監務大小三百餘戍守之兵皆取涼州節度及安祿山犯關肅宗在靈武盡召河西戍卒收復兩京吐番乘虛遂襲取涼隴華人百萬陷於邊外開成之際朝廷遣使還番過涼肅瓜沙城邑如故華人見漢旌使齊夾迎泣訴問皇帝還念陷番生靈否當時已經再世雖語言小訛而衣服未改至今涼州漢戶猶稱上代是鄆州戍卒每帥守關則請命于朝廷

梁開平二年正月遣使朝貢二月以吐番入朝使盟末首

金方巴... 卷三十
額杜論悉伽社論心為左領軍衛將軍同正
乞祿為右領軍衛將軍同正

乾化元年十一月又遣使來朝名對于朝元殿賜金帛
等遣之

後唐天成二年十二月遣使野利延孫等入貢并番僧
四人持番書二封人莫識其字 三年正月以入朝使
野利延孫等六人並為歸德將軍其年九月又遣使朝
貢以入朝使閻薛羅等三人並為歸德司戈 十二月

又以入朝使薛謁薛王子撥遘為歸德郎將首領十人並為歸化司戈 四年九月西京府番官揆心等來朝十月首領掇里忙布蘭遘等來朝並授歸德司戈

長興三年二月又遣使朝貢三月以朝貢使北廂首領野利閻心為歸德大將軍右廂首領籤心為歸化郎將軍中廂首領季讀等並為歸德司候重云都督對兒六突兒難等並為歸德司陞其年七月復遣使入朝引對于端明殿問本番牙帳去京師遠近對曰在涇州西二

千里 四年十一月遣使來貢召對于內殿賜以金帛
仍各賜虎皮一張

晉天福四年十月罷延族大首領聶褒郎彛磨標昌訶
尤羅祗褒等率其屬朝貢

周廣順二年九月河西節度使申師摩一作厚奏吐番首領折

通支等請加恩命其月勅以吐番左廂押番副使折通
支右廂崔虎心並授銀青光祿大夫檢校工部尚書楊
妃谷大首領沈念般授懷化大將軍左廂大首領錢于

闕篤為歸德大將軍沒林葛于疑盧伴遣折通窮羅並
為懷化大將軍右廂大首領鹿悉迦阿羅兵騷奴並為
歸德大將軍沈念般牝與龍文温元積並為懷化大將
軍中廂首領岳阿西安九十並為懷化大將軍又奏自
涇州安國鎮至西涼府沿路三處控扼各立州各欲補
大首領為刺史又管蕃界部落大首領三十餘人各賜
空名告身並從之

高麗

高麗本扶餘之別種其國都平壤城即漢樂浪郡之故地在京師東五千一百里東渡海至于新羅西北渡遼水至于營州南渡海至于百濟北至靺鞨東西三千一百里南北一千里其官大者號大對盧比一品總知國事三年一代若稱職者不拘年限對盧以下官總十二級置外州縣六十餘大城置僭薩一人比都督小城置通使一人比刺史其下各有僚佐分曹掌事其王以白羅為冠白皮小帶咸以金飾其俗多淫祀事靈星可汗

箕子等神國城東有大隧名曰隧神常以十月王自祭之俗好經書至于庶賤之家各于衢路造大屋謂之局堂子孫晝夜讀書習射前王姓高氏世通中國常遣朝貢

後唐同光三年十一月遣使廣評侍郎上柱國韓申一副使春部少卿朴巖來貢方物至四年正月授韓申一朝散大夫試殿中監朴巖朝散郎試秘書郎

天成四年八月復遣廣平侍郎張盼等五十二人來朝

貢銀香獅子銀爐金裝版鏤雲星刀劍烏突金銀鷹絛
鞵白紵白毡頭髮人參香油銀鏤剪刀鉗鉸松子等

長興三年二月復遣使大相王儒來朝 其年六月權

知國事王建為特進檢校太保使持節元菟州都督充
大義軍使兼御史大夫上柱國高麗國王七月又以其
妻柳氏為河東郡夫人

清泰三年十二月遣使禮賓卿邢順等來朝貢 三年

三月以入朝使禮賓卿邢順試將作少監副使崔遠試

少府監主簿 其年又遣使王子大相王規等來貢方物以大相王規為檢校尚書右僕射副使廣評侍郎崔禹試將作監其隨行節級等三十餘人並授司戈司陞等職

晉天福三年八月清州奏高麗國宿衛質子王仁翟乞放歸鄉里從之 四年九月復遣廣評侍郎邢順等七十二人來貢方物 六年八月其國王復遣廣評侍郎關其國王建為開府儀同三司檢校太師使持節元菟州

都督充大義軍使高麗國王命國子博士謝攀持節就冊之 八年復遣王子大相王申等來

開運元年正月以入朝使王子大相守倉部令上柱國賜紫金魚袋王申一為檢校尚書右僕射正朝守廣評侍郎柱國丹金魚袋柳迴訓檢校禮部尚書守廣評郎中韓李康試少衙卿守廣評郎中朴立信試大府少卿守兵部主事韋安試將作監主簿以進奉賀登極使丕朝前守廣評侍郎柱國丹金魚袋金仁逢可檢校工部尚

書副使禮賓卿柱國丹金魚袋金裕可試大府卿判官
兵部郎中張規可試衛尉少卿 二年其國主王建卒
其子武嗣位十月遣使廣評侍郎朝立珪副使前禮賓
卿金廉等一十八人來朝十二月以權知高麗國事王武為
特進檢校太保使持節元菟州都督充大義軍使兼御史
大夫高麗國王仍命光祿卿范光政太子洗馬張李凝
就行冊命王武者王建之子本國中大族國人推而為
主有智勇兵力日盛以兵併三韓百濟之地東方君長

最為雄盛漢乾祐末王武死其子王昭代立

周廣順元年正月遣廣評侍郎徐遼等九十七人來朝
貢二月以權知高麗國事王昭為特進檢校太保使持
節元菟州都督充大義軍使兼御史大夫高麗國王仍命衛
尉劉舉通事舍人顧彥浦持節冊之劉舉尋卒于路
顧彥浦溺海而死 二年九月復以太僕少卿王演借
衛尉卿充高麗國冊禮使右衛率府呂繼贊借將作少
監充副使

顯德三年十月復遣使王子大相王融來貢方物又遣廣評侍郎荀質來賀登極其年十二月授其國王王昭開府儀同三司檢校太師高麗國王五年六月命尚書水部員外郎韓彥鄉尚輦奉御金彥英使于高麗因命賚帛數十疋就彼市銅以備鑄錢之用六年正月又遣其臣王子佐丞王兢佐伊皇甫魏光等貢名馬織成衣襖弓劍等其年八月遣使進別序孝經一卷越王孝經新義八卷皇靈孝

經一卷孝經雌圖三卷

別序者記孔子所生及弟
子從學之事新義者以越

王為問同以什疏文之是非皇靈者止說延年辟灾
之事及志符文乃道書也雌圖者止說月之環暈星
之藝字災異之應
乃識緯之書也 其年十一月遣使貢銅五萬斤

紫白水精各二千顆

渤海

渤海靺鞨本高麗種唐總章中高宗平高麗徙其人
散居中國置州縣于遼外就平壤城置安東都護府
以統之至萬歲通天中契丹李萬榮反攻陷營

府有高麗別種大舍利乞乞仲象

大姓舍利官乞乞仲象名也

與靺鞨反人乞乞羽走保遼東分王高麗故地則
天封乞乞羽許國公大舍利乞乞仲象震國公乞
乞羽不受命則天命將軍李楷固臨陣斬之時
乞乞仲象已死其子大祚榮繼立并有乞乞羽之衆勝
兵下戶四千餘保據挹婁故地至聖歷中稱臣朝貢
中宗命侍御史張行岌就往宣慰號其都為忽汗
州以祚榮為忽汗州都督封渤海郡王國自稱渤海

其俗呼其王為可毒失對面呼聖王牋表呼基下父
母老王曰大妃妻曰貴妃長子曰副王諸子曰王子
氏以為大酋長唐室朝貢不絕

梁開平元年五月其王大誣譔遣王子大昭順來貢方
物至二年又遣殿中少令崔禮光來朝 三年三月遣
其相大誠諤來朝兼貢女口

乾化二年五月又遣王子大光贊來朝貢方物太祖厚
有錫賜

後唐同光二年正月遣王子大禹謨來朝 五月又遣
王子大元讓來朝莊宗賜金綵以遣之 八月又遣學
堂親衛大元謙試國子監丞 三年二月又遣使裴璆
貢方物進細女口 五月以入朝使政堂省守和部少
卿賜紫金魚袋裴璆為右贊善大夫

天成元年四月遣使大陳林等一百十六人來朝貢進

兒

一作男

口女口各三人并人參昆布白附子等 其年

七月遣使大照佐等六人朝貢先是契丹大首領邪律

阿保機兵力雄盛東北諸番多臣屬之以渤海國土地相接常有併吞之志是歲率諸番部落攻渤海國扶餘城下之改扶餘為東丹府命其子突欲留兵鎮之未幾阿保機死渤海王命其弟率兵攻扶餘城不能克保衆而退

四年五月又遣高正詞入朝貢方物七月以正詞為太子洗馬

長興二年十二月遣使成文角來朝三年正月又遣使來朝貢四年七月以先入朝使成文角為朝散大

夫右神武軍長史奏事右錄事試大理評事高保又為朝散郎右驍衛長史並賜金紫

清泰二年十二月遣使列周道等入朝貢方物

三年二月以入朝使南海府都督列周道為檢校工部尚書政堂省工部卿烏濟顯試光祿卿

周顯德元年七月渤海國雀鳥一作雀鳥斯多等三十人歸化

新羅

新羅弁韓之苗裔其國在漢樂浪郡之地南東俱限大

海西接百濟南隣高麗東西千里南北三千里有城邑村落其王所居曰金城周七八里衛兵三千人文武官凡十七等風俗刑法與高麗同而朝服尚白人多金朴兩姓俗重元日相慶賀以是日拜日月之神婦人以髮繞頭用綵及珠為飾髮甚鬢美其王金貞唐武德四年封樂浪郡王龍朔三年又以其國為鷄林州授其王鷄林州都督世以金氏為首長朝貢不絕

後唐同光元年十一月其王金朴英遣倉部侍郎金樂

錄事參軍金幼卿來朝貢 二年六月又遣使朝散大
夫倉部侍郎賜紫金岳來朝貢授金岳朝議大夫試衛
尉卿

天成六年二月遣使張芬等來朝其年五一作三月以新羅

國權知康州事王逢規為懷化大將軍新羅國前登州
都督府長史張希巖新羅金州知後官本國金州司馬
李彥謨並檢校右散騎常侍其月又以入朝使中散大
夫兵部侍郎兼賜紫金魚袋張芬為檢校工部尚書副

使兵部郎中朴述宏兼御史中丞判官倉部員外郎李忠式兼御史 其年四月新羅國康州遣使林彥來朝貢名對於中興殿賜物有差 四年二月青州奏于登州岸獲新羅國船一隻進其寶貨

長興二年四月權知國事金簿遣使金肱來貢方物

清泰二年二月以入朝使執事侍郎金肱為檢校工部

尚書副使司賓大卿李孺一作儒試將作少監

黑水靺鞨

靺鞨蓋肅慎之地後魏為勿吉在京師東北六千餘里東至于海西接突厥南界高麗北隣室韋其國凡為數十部各有渠帥而黑水靺鞨最處北方尤矜勁健性凶悍無憂戚貴壯而賤老俗無文字兵器有角弓楛矢

唐開元十年三月安東郡都督醉泰請于黑水靺鞨內置黑水軍以最大部落為黑水府以其首領為都督仍置黑水府長史一員部落兼領之

後唐同光二年九月遣使烏嚕來朝以烏嚕為懷化中

郎將遣還番 三年五月黑水部多羅遣使朝貢

天成四年八月遣使庫濟來朝兼貢方物以庫濟為歸
德司戈遣還番

長興元年三月其首領烏嚕復遣使朝貢 二年五月
青州奏黑水烏拉部至登州賣馬 三年二月青州奏
黑水達喇哈狀申父呼圖哩卒所有勅賜朱鈐記未敢
行使

南詔蠻

南詔蠻本烏蠻之別種在漢永昌之東姚州之西蠻俗謂王曰詔其先渠帥有六故號六詔各有君長不相統攝在唐時亦時來朝貢

後唐同光三年閏十一月魏王繼岌奏遣使賫書招諭南詔蠻時初平蜀川乃募曾使南詔者有秦州副使徐藹請雲南苴咩城路且云唐中和年僖宗在蜀命嗣王龜年使雲南藹季父為副使藹為判官時不到苴咩城私達善闡迴約為甥舅許降安化公主雲南使來迎公

主使次服收復長安黃巢東走乃託以他歲而止

天成元年十月供奉官李彥楷高品李光裕雲南使迴
山後兩林百蠻都鬼王右武衛大將軍李卑晚差大鬼
主傳能阿花等來朝貢明宗御文明殿引對百官稱賀
李卑晚為寧遠將軍大渡河南山前邛川六姓都鬼王
懷安定王勿定標莎為定遠將軍 二年七月以左金
吾衛將軍烏昭遠為左衛上將軍入蠻國信使 其年
九月西川奏據黎州狀申雲南使趙和于大渡河南起

舍一間留信物十五籠并雜詩一卷遞至闕下初郭崇
韜平蜀之後得王衍等獲俘數千以天子命令使人入
其部被止于界上唯國信與蠻俘得往續有轉牒稱都
督爽大和長國宰相布燮等一大人唐皇帝男奏疏一
封自鸛拓歷闕幾闕白闕爽等又人弄揀演習自鸚鵡
郡膳裔爽等又入平蠻新安寧遠標莎差人轉送黎州
其緘厚硬如皮筆力尤健有詔本後有督爽強著忍爽
爽寶督彌勒君爽董德義督爽長垣忍爽緯楊布燮等

所署有彩牋一軸轉韻詩一章章三韻其一聯有類擊
筑詞頗有思本朝姻親之意理亦不遜其籠中即返其
國信舊封猶存復命左衛上將軍烏昭遠往皆不能去

牂牁蠻

牂牁蠻其地北至兖州一百五十里東至辰州二千四
百里南至交州一千五百里西至昆明九百里無城郭
散居村落多霖雨稻皆再熟無徭役唯戰征之時乃相
屯聚刻木為契其法劫盜者三倍還賦殺人者出牛馬

三十頭乃得贖死首領姓謝氏唐室頻遣使朝貢

後唐天成二年八月牂牁青州八郡刺史守朝化等一百五十人來朝貢進草豆穀二萬顆硃砂五百兩黃蠟二百斤各賜官誥金帛遣之

昆明國

昆明部落在黔州西南三千里山路險阻住止高欄亦有羊馬其俗椎髻跣足渠長披虎皮下者披毡

後唐天成二年八月昆明大鬼主羅殿王普露靜王九

部落各差使者隨牂牁來朝貢

占城國

占城國在中國西南其地東西一百里南北二千里東暨海西暨雲南南暨真臘國北暨驩州界東北至兩浙海行一月程其衣服制度大畧與大食國同所乘皆象馬粒食稻米肉食水兕山羊之類獸之奇者有犀牛鳥之珍者有孔雀前世多不與中國通

周顯德五年九月其國主因德漫遣其臣甫阿散等來

貢方物中有灑衣薔薇水一十五瓶言出自西域凡水
之濡衣者香而不黧又貢猛火油一十四琉璃瓶引對于
內殿賜以冠帶衣服等其表文以貝多葉檢以香木函
其年十一月入朝使甫阿散金姿巨羅辭各賜繒帛有
差仍命齎金銀器一千兩繒綵一千匹細甲名馬銀鞍
勒等就賜其國王

雜錄

後唐天成元年六月十日御史臺奏伏覩今月二日入

閣班退後方引對朝貢番客竊觀近制頗失常儀且月
華門是宰相兩省近侍官常朝來往之所外國番國朝
見不合出在此門而又殿庭班序先退北者列其百辟
示彼四裔俾觀多士之羽儀以顯九重之嚴重豈可衆
官退後番客方來合自正門直趨丹殿此是向來事例今
辰忽有更張竊以方屬中興宜循舊典伏乞宣付中書
門下重令參詳永為定制奉勅宜令太常禮院檢舊例
申奏者右太常禮院奏臣謹按開元禮以賓禮待番客

有六一番國王來朝二戒番王見日三番王奉見四受
番使表及幣五宴番國王六讌番國使從開元定禮之
後本朝故事對諸番客又並於內殿引對其殿名曰參
殿事在禮賓使客省使不下外諸司見今施行不一近
制唯迴鶻番使則正殿引對况迴鶻見居甘州其地尤
屬河西道涼州所管每遣使進表幣待以賓禮皇帝御
正殿列百辟陳盛儀酌禮沿情事恐太重伏請今後
准諸番客例祇于內殿引對不臨正朝兼免乖越又符

故事謹具詳酌如前奉勅四裔來王歷代故事前後各因強弱撫制互有典儀大番頒示于威容則於正衙引對小番但推其恩信乃于內殿撫懷憲司奏論禮院詳酌皆徵故事咸有明文正衙威容未可全廢內殿恩澤且宜常行若遇大番入朝即准舊儀于正殿排比鋪陳立仗百官排班於正門引入對見 四年二月勅沿邊置場買馬不許番部至闕下

周廣順三年三月詔禁沿邊州城兵仗于諸番部

--	--	--	--	--	--	--	--	--

1000

1000

1000

1000

五代會要卷三十